

De Dannerschberg - mei haam!

Am Dannerschberg sein ich dehaam-
Do sad mer noch statt ‘‘Baum’’ de Baam.
Zum ‘‘Stein’’ sad mer noch heit de Staa -
un die ‘‘Beine’’ sein halt do die Baa.
Im Summer robbt mer die Gehannisbeere.
Wann Schnee leit fahrt mer mit em Schleere.

In Staabach hot mei Wiech gestann.
Dort hot die Mamme geschoggelt mich dann.
Hot mer de Nuddel in’s Meilche gesteckt,
ich glaab noch heit, der hot no Zugger geschmeckt!
Mit siewe Johr hunn ich noch genuddelt;
dann hunn ich de Nuddel im Garde vebuddelt.

Als Kind war’s doch dehaam so schee.
Ich kunnt’ noch uff die Stroß als geh!
Kunnt’ speele mit meim Scheiwelrad,
zu de Leit hunn ich als ‘‘Gunn Dach’’ gesat.
In veele Hef’ hunn ich als gegliggert,
hat ich gewunn, hunn ich als gekiggert.

Mit de Bobbeschees hunn ich als gespeelt -
unn de Bobbe hunn ich als Märcher vezeelt.
Die Kinner vunn heit dun beim Speele glei motze.
Die hogge vel lieber in de Stubb vor de Glotze.
Ja - ehr Leit - ans kann ich eich saa:
Ich war a mol a Kind - unn a mol ganz klaa!

Börrstadt, im Januar 1990

Wilma Schappert

Gott bewahre mir mein Steinbach!

Meiner Heimatgemeinde Steinbach / Dbg.
zur 800-Jahr-Feier gewidmet.